

五點半的泔糜仔

抹鹽的塗豆仁仁鹹芳鹹芳
一粒一粒愈哺愈芳
毋驚傷鹹 有糜

淋淡薄仔豆油的卵包 祛禰的邊仔小可仔赤赤
一人一粒無通較加 一喙一喙愈哺愈芳
毋驚傷赤 有糜

甜物物黃錦錦的豆棗
一改夾咧幾若條
毋驚傷甜 有糜

肉酥肉拊仝兄弟
有時兄哥 有時小弟

糜

逐工逐工

透早五點半一定起床等候逐家圍倚來
塗豆 豆棗 卵包 肉酥肉拊 齊齊來

大飯店的早頓誠豐沛
毋管你是幾星級
無糜 無級

我懷念五點半的
泔糜仔